



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

Tir Yimyim

tiryimyim@aolima

tir yimyim

TAPAK 8

Assam-i sobaliba temeyoktep  
kümzüka ayutsü: Priyanka Gandhi

Myanmar court-i Suu Kyi anema  
ken o talila ana benok



VOL. XVIII NO. 137 (ADOK 137) DIMAPUR

SANGTENNÜ (TUESDAY)

METSÜREMI (MARCH) 02, 2021

₹ 5.00

## PM Modi-i Covaxin dose mezüngbuba agiogo

**New Delhi, March 1 (Agencies):** Hombarnü Prime Minister Narendra Modi-i Covaxin indang dose mezüngbuba agia linük nung COVID vaccine tanabuba agütsüba maparen tenzüksüogo.

All India Institute of Medical Sciences (AIIMS), Delhi nung PM Modi-i Bharat Biotech ajanga yangluba Covaxin agi.

"Tanü AIIMS nung COVID-19 vaccine dose mezüng agiogo. Alima nung COVID-19 anema rara nung doctor aser scientist temi mapang tatsüka tsüingda mapa tajung inyaktetba atema süngmanger. Vaccine agütsüpur ajaki menungnangi agütsü mepishir" ta PM Modi-i metetdaksü.

"Asenok külemi India nung COVID-19 samatsüdi" ta paisa ayongzük.

PM Modi-i vaccine agiba sülen ghonda ishika lir Union Home Minister Amit Shah-ia vaccine agiogo.

Medanta Hospital doctor temi Amit Shah nem vaccine agütsü aser tanü External Affairs Minister Dr S Jaishankar-ia vaccine agiogo.

Covaxin ya India nung Bharat

Biotech-i Indian Council of Medical Research (ICMR) den yaritepa yangluba lir.

Ano, linük nung tang amshiba tanabuba vaccine ji Serum Institute of India (SII) ajanga yangluba Oxford-AstraZeneca indang Covishield lir.

Alima nung lennir aikati Covid-19 vaccine agiogo aser tanü PM Modi-a parnok den züngsemogo.

Yaküm December ita US President Joe Biden aser Vice President Kamala Harris nati mapa tasen magizükdang Covid-19 vaccine agia liasü.

Taküm January nung Britain nung Queen Elizabeth (94) aser ka kinungbo Prince Philip (99) nati Windsor Castle nung vaccine agi. Kasa ita UN Secretary-General Antonio Guterres-ia vaccine agiogo.

January nungsa Saudi Arabia nung King Salman-i vaccine agi. Par jabaso aser Crown Prince Mohammed bin Salman-i yaküm December ita vaccine agi.

December ita nung Israeli Prime Minister Benjamin Netanyahu-ia Covid-19 vaccine agiogo.

## COVID-19 Nagaland: Puteter aser taneptsü angur maliasü

**Kohima, March 1 (TYO):** Hombarnü Nagaland nung nisung shinga dak COVID-19 aliba meputet.

"Tanü nisung ka dak danga COVID-19 aliba meputet" ta Health & Family Welfare Minister, S Pangnyu Phom-i ashi.

Nisung 12,200 rongnungi 11,949 taneptsü nguogo aser tang parnok 7 anepaludar, ta paisa ashi.

Nagaland nung COVID-19 nungi taneptsü angurji 97.94% lir, ta Health & Family Welfare

Director, Dr Denis Hangsing-ia ashi.

Nagaland nung nisung 91 süogo saka parnok 10 bo tanga timtem ajanga asü. Külén, nisung 153 tashi tanga state temi ao, ta paisa metetdaksü.

"Nagaland nung COVID-19 alitsü akok ta temolung melemi bilemba sample 1,30,436 tendangogo. RT-PCR ajanga sample 74,764, TrueNat ajanga sample 37,347 aser Rapid Antigen Test ajanga sample 18,325 tendang" ta Dr Hangsing-isa metetdaksü.

## Nagaland nung Covid vaccine tanabuba shilem agütsü

**Kohima, March 1 (TYO):** Hombarnü Nagaland nung teintet rogotem aser tashidak alir arishi küm 45 ser temapur nem COVID vaccine agütsüba mapa tenzükgogo.

"Tanü Dimapur, Kiphire, Longleng, Mokochung, Mon, Phek, Tuensang aser Zunheboto district hospital tem den Naga Hospital Authority, Kohima, Urban Primary Health Centre, Wokha aser Jalukie Community Health Centre, Peren nung vaccine agütsüogo" ta State Immunization Officer Dr Ritu Thurr-i metetdaksü.

"Arishi küm 60 ser temapurtem aser ano temang nung timtem alir arishi küm 45 ser temapur nem vaccine ya angati agütsür. March 7 nungi vaccine agütsüba mapa tuluba inyaktsü," ta Dr Ritu Thurr-isa ashi.

Tanü arishi küm 60 ser

temapur nisung 180 aser arishi küm 45 ser temapur nisung 45 nem vaccine agütsüogo. Tanü vaccine agirtem rongnung tambutisangji Longleng district nungi arishi küm 89 tain tambur ka liasü, ta paisa ashi.

Tanü tashi nung Nagaland nung Covid vaccine indang dose 35,789 agütsüogo. Parnok rongnung frontline workers 19,779 aser healthcare professionals 10,238 dena lir, ta Dr Thurr-isa metetdaksü

Healthcare professionals nungi nisung 5,579-i tanabuba dose agiogo aser parnok nem vaccination certificate agütsüogo, ta State Immunization Officer-isa ashi.

"Tanü agütsürtem dena vaccine agir shinga dak-a temang nung timtem adokba osang mali," ta paisa shisem.

## PDA teshimtet teloki AICTE Chairman den ajurutep



March 1, 2021 nü New Delhi nung PDA teshimtet teloki All India Council Technical Education (AICTE) Chairman Professional Dr. Anil Sahasrabudhe den ajurutepdang agiba noksa angur.

**Dimapur, March 1 (TYO):** March 1, 2021 nü PDA teshimtet teloki All India Council Technical Education (AICTE) Chairman Professor Dr. Anil Sahasrabudhe den ajurutepogo.

AICTE office, New Delhi nung Higher Education & Tribal Affairs Minister aser State BJP President Temjen Imna Along, Housing & Mechanical Minister Tongpang Ozukum aser Higher TE & Election Advisor Medo Yokha nungertemi Dr. Anil Sahasrabudhe den senden amen.

Iba mapang PDA MLA temi Chairman aser Ministry ketdangsurtem dang Nagaland nung Higher & Technical Education Department-i nüngdakba onüktem lemsatep aser Ministry-i yaritsü mepishi.

Iba mapang Ministry ketdangsurtemi Nagaland nung Polytechnic Institute atema hostel 5 talila yanglutsütsü aser Polytechnic Institute ajak nung modern laboratories aser IT equipments enoktsütsü nangzük.

Parnoki PDA züngsemtem dang anogo 15 tsüingda Ministry dangi DPR yoktsü ashi.

AICTE chairman-ia Nagaland nung National Institute of Technical Teachers Training and Research (NITTTR) lapoktsü molunga agizük aser iba onükji Ministry of Education dangi abentsü nangzük.

Senden nung Vice-Chairman AICTE M.P. Poonia, member Secretary Rajive Kumar aser Ministry nungi tongtipang ketdangsurtem aden.

## Australia nunger den yaritepa HSLC tatidang atema digital class renemer

**Dimapur, March 1 (TYO):** Australian educators-i Nagaland nung tesayurtem den education delivery model ka yangludar.

Iba mapatong ya NagaEd ajanga tenzük aser iba ajanga parnoki kaketshir nem quality education agütsütsü alizüing lir. Iba digital crash course ya class 10 kaketshirtemi HSLC tatidang agütsüba nung teyari angutsü atema lir. Iba course nung NBSE curriculum atema eLearning design agütsür aser NagaEd Digital School ajanga angutsü.

NagaEd Digital School nung kaketshirtemi notes, videos, interactive games & quizzes ajanga tajungba angazüker. Crash Course Program ya tan hopta school 5 nung tenzüksü aser iba nung kaketshir 300 aser tesayur aika nem training agütsütsü.

"Australia educators aser Nagaland tesayurtem tsüingda

yaritepa inyakba ya kaketshirtem dang tajungba sayutsü atema lir. Iba ajanga kaketshirtem, tesayurtem aser ketdangsurtemi maongka angur" ta NagaEd Founder, Kevisato Sanyü-i ashi.

RMIT University Australia nung Senior Learning Designer Tran Nguyen-i Nagaland nung tesayurtem den yaritepa digital courses renemer.

"NagaEd den külemi inyaksemba nung aika ajangshia arur aser tenük lapoktsüogo. Ni Australia nung alir asünung, Nagaland nung Learning and Teaching team den külemi mapa inyaka arudang tayongzükba aika ajurur saka kaketshirtem taginüba tongtsütsü atema onoki inyaker. NagaEd-i meta talang pilar alirtem asoshi course balala renemba ya kanga dang junga shisateta inyaker" ta Tran Nguyen-i ashi.

"Naga nungeri technological education wadang nung iba ama mapa tulu inyakba ajanga ni kanga ajungmesor. Parnoki inyakba mapa atema tenüngsang agütsür" ta Christian Higher Secondary School Vice Principal, Patricia Zhimomi-ia metetdaksüogo.

"Onoki kaketshirtem nem offline aser online ajanga quality education agütsütsü atema delivery model ka renemer. Kaketshirtem ket nung oset maliba aser internet connectivity majungba ajanga timtemer aser iba tayongzükba koktettsü atema onoki inyaker. Iba delivery model indang taruba shilem renemtsü atema onoki school tem jaokogo. Tejangrartemi hello@nagaed.com mesüra website at www.nagaed.com ajanga onok den tongteprateptsü akok" ta Kevisato Sanyü-ia ashi.

## Arunachal nung NSCN (IM)-i NSCN (KK) züngsem ka khaset

**Dibrugarh, March 1 (Agencies):** Arunachal Pradesh kübok Longding district nung NSCN telok balala tsüingda khatepdang NSCN (KK) züngsem ka khaset.

Iba ya Chatung yimtsüing anasa arem ka nung atalok. Deobarnü parnok khatepdang

NSCN (I-M) telungpurtemi NSCN (KK) züngsem Jomie Konyak khaset, ta security ketdangsurtemi ashi.

Jomie Konyak ya Nagaland kübok Mon district nungi liasü aser pa ya sergeant major Wangle Wangsu lenisüba kübok mapa inyaka liasü, ta

ketdangsurtemi ashi.

Tashiyim agi sen saruba maparen atema telok ana ya mapang tatsüka meputepi arur ta osang ajangasa ashi.

Iba tesemi security forces ogo aser telungpurtem aputsü atema mapa inyakdar, ta security ketdangsur kati ashi.

# ABAM Sunday School Adult Christian Education sentong agi



**Dimapur, Metsüremi/March 01 (TYO):** ABAM Sunday School Adult Christian Education sentong February 27 aser 28, 2021 anogotem Impur nung kanga takok ngua agiogo. Iba sentong nung Associate Pastor Christian Education, Associate Pastor Youth aser Sunday School superintendent ajak meyokteter parnok 75 shi arua dena liasü.

Iba sentongya tanü asen Ao arogotem nung teintet roko asoshi Tsüngrem O anganütsü

rondak nungdak ta angateta, Deobar Skol nung akhi ama adult class ya asentenshia agitsü nükla nung agia liasü, ta Rev. Dr. Mar Atsongchanger, Executive Secretary, ABAM ajanga sangdong ka nung ashi.

Tanü arogotem ishika dak alaka iba adult class makai teintet rogo asoshi mejeteta Tsüngrem o anganüba sabang mali. Anungji, parnok asoshi arogotemi Tsüngrem o angatsü maongka lapokja adult class agitsü tongtipang ta iba sentong

nung tesayuba tajung agiüa tangzükba tulu angu.

Nükla tulu nung iba sentong tajung agia aodang Tsüngremer leniba ajak den liang ta ABAM tamang ayur, ta sangdong ajanga ashi.

Iba sentong nung tongti shilem agir ya T. Apok Jamir Secretary, Literature & Education Ministry, ABAM, Dr. Moalila Lecturer, CTC aser Mr. Chubatemjen Ozukum, Coordinator, Sunday School ABAM nungertem liasü.

# Assam Rifles temi state nung teyari balala agütsü

**Dimapur, Metsüremi/March 01 (TYO):** HQ IGAR (North) kübok Assam Rifles, Shamatore Battalion ajanga Noklak aser Tuensang district nung February 28, 2021 nü Wheel chairs aser hearing aids tem lema agüja liasü.

Matamabensartem tejak tentettsü aser takum jenjang tajungba kumdaktsütsü nükjidong nung Assam Rifles

temi iba sentong ya ayongzüka liasü. Iba project kübok Wheel Chair 14 aser Hearing Aids 17 tashi matamabensar nem lema agütsü. Iba den külemi angadi medical check up den item oset ya koma amshitsü, ta tesayubatem agüja liasü.

Maneni Kiphire jila nung February 27, 2021 nü Longya Ward Youth Organization ajanga District AIDS Prevention and

Control Unit on HIV prevention campaign ka ayongzükba nung HQ IGAR (North) kübok Assam Rifles, Kiphire Battalion nungia shilem agia liasü.

Iba sentong nung Nagaland State AIDS Control Society nungi ketdangsurtemi yimdaklir den HIV nungi jenbua alitsüba indang rateta ashi. Iba sentong nung Kiphire jila nungi nisung 40 shi dena liasü.

# Longsachung yimdak angadi medical camp agütsü



**Dimapur, Metsüremi/March 01 (TYO):** District Administration aser Beti Bachao Beti Padhao (BBBP) kübok DLCW - MSK nati Health and Family Welfare, Sakhi- One Stop Centre den lungjemer Longsachung Village Community Hall nung February 28, 2021 nü PCPNDT Act (pre conception and pre Natal Diagnostic Technique Act) aser PMMVY (Pradhan Mantru Vandana Yojana- Maternity Benefit Scheme) indang awareness sentong den Free

Medical Camp ka ayongzüka liasü.

Iba sentong nung Case Worker-Sakhi-One Stop Centre, Thungbeni Kikon-i PCPNDT Act & OSC indang jemi aser Emilo, Assistant District Co-ordinator PMMVY ajanga Pradhan Mantru Vandana Yojana- Maternity Benefit Scheme indang jembia liasü.

Dr. Thungjamo Jungio, Medical Officer, Primary Health Centre, Nyiro ajanga yimdaklir den COVID mozü

indang angatetdaksü aser temang anema alitsü asoshi iba mozü ya ajaki agitsü ayongzükba liasü.

Yimtsüng semdanga nüburtem nem scheme balala indang angatetjemdaksüba asoshi Longsachung Village Council Chairman, Yakhasao Ezung-i pelaba ashi. Iba sentong tembangba sülen yimdaklir atema angadi medical camp ka katsü, kong tashidak balala agi shiranga alir nisung 672 temang repranga angadi mozü lema agüja liasü.

# Dimapur nung train agi nisung ka menüngset

**Dimapur, Metsüremi/March 01 (TYO):** Dimapur Railway station nung RXR Rangapahar tsütsü 254/4 Kms anasa mejangjaba nisung tasü mang (Naga nung masü/tebur arishi kum 30 shi) ka March 1, 2021 nü nguteta liasü aser iba nisungba ya train agi menüngset südi, ta temolung melemi lir.

Ozüng agi melaba ama maparen ajak temer tasü mang ya PM examination/jangjatetsü asoshi District Hospital Dimapur Morgue nung ya lir.

Kibur/kinunger mesüra tembartemi Officer-in-Charge, GRPS, Dimapur den tongteprateptsü akok, ta sangdong ka ajanga ashi.

# Khezhakeno Baptist Church tekülem ki tasen meshitetogo



*(Noksa temaba) Khezhakeno Baptist Church indang tekülem ki tasenba angur. (Noksa tsünglangba) Rev. Krotso Mero den Minster Neiba Kronu, pa kinungtsü aser arogo lenirtem tekülem ki tasenba kima tangokba angur.*

**Dimapur, Metsüremi/March 01 (TYO):** Khezhakeno Baptist Church (KBC) indang tekülem ki tasenba meshitetba sentong ka February 28, 2021 nü iba tekülem kidang agia liasü. Iba tenlaki tasenba ya Rev. Krotso Mero, Executive Secretary, Chakhesang Baptist Church Council (NBCC) ajanga meshitetba sarasademtsü.

Arogo senotsü amshiri osang agütsüba agi, storey asem atongtepa yangluba tekülem ki ya sen crore 2.10 shi indoka kum pezü nung renem aser iba tekülem ki ya ali 75x90 square feet nung amendaker yanglu, kong nisung 1200 dak tema amentsü akoktsü.

Iba tekülem ki yanglutsü atema nüngshilong ya December

2, 2012 nung Rev. Khrotso Mero-i aziingja liasü. Iba mapang Mero ya Chakhesang Baptist Church, Kitsubozou nung Senior pastor liasü aser paisa iba tekülem ki ya CBCC indang Executive Secretary ka ama meshitetba lapoktsü.

Iba tekülem ki meshitetba sentong nung Church Building Committee chairman, Timikha Koza menden liasü aser iba arogo indang choir aser tila tanurtemi temeja ken aten.

Tekülem mapang Pastor C. Kemvu Koza-i anir agi aser Associate Pastor, Thochu-i Tsüngrem temoatsü jazüka sarasadem aser Chairman, Khezhaka/Kuzha Tephe Baptist Church Council (KKTBCC) ajanga salem o lemsatapa liasü.

# Dr. Shürhozelie Liezietsu-i asükhu lemsatep

**Dimapur, Metsüremi/March 01 (TYO):** Hombarnep Dimapur nung Central Woman Wing, NPF indang general secretary Helena Yepthomi kinungbu Hokiye Yepthomi ajungbena asüba osang angashia ni aser party tenüng nung mangyim jashi lemsataper, ta Naga People's Front tir Dr. Shürhozelie Liezietsu-i

sangdong ka ajanga ashi.

Helena den kasa party mang ayimer aser la mangyim tia nung alidang tesuneptsüba agüjang, ta sarasademtsür.

Pa asüba asoshi onoki mang ayimer aser asür kinunger den asükhu lemsataper aser Tulusang Tsüngremi parnok nem anisingzük agüjang ta sarasademtsür, ta sangdong ajangasa ashi.

# Assam-i sobaliba temeyoktep kümzüka ayutsü: Priyanka Gandhi



**Congress lennir Priyanka Gandhi-i Assam nung tetsürtem den ajurutepdang agiba noksa ka angur.**

**Guwahati, March 1 (Agencies):** Assam- sobaliba temeyoktep kümzüka ayutsü ta Congress lennir Priyanka Gandhi-i ashi.

Priyanka Gandhi-i anogo ananü atema Assam semdangi arua lir aser tanü lai lokti sentong ka nung o jembidang "Assam nung sobaliba temeyoktep ya Assam'er tashi lir" ta ashi.

"Assamese nunger den ajurutepa sensaksem aser idangji Assam nungeri sobaliba temeyoktep wazüka ayutsüba ajitetogo" ta lai ashi.

"Congress-i Assam kümzüksü atema Assam nunger den külemi noktaker. Joi Aai Axom" ta Priyanka-i

metetdaksü. Laisa süngolu nung tetsür aayangertem aser Self Help Group züngsemtem den ajurutepa sensaksem.

"Nübertemi chichiba lennirtem metettsüla. Nübertemi lennirtem mejangjara, taküm liyonga aotsü atema tetsükdaksü ajurutsü" ta Priyanka-i süngolu nung mapa inyakertem dang ashi.

BJP yimsüsüba kübok Assam nung tetsürtem lendong nungi kümzüka mali. Assam nung tetsürtem anema mapa inyakba timba akümer saka BJP sorkari iba atema mapa kecha meinyaker, ta laisa metetdaksü.

"Linük nung tetsürtem dak tashiyim mapa timtiba inyakbaji Assam state lir. Sorkari iba inyakyim azüoktsü atema mapa kecha meinyak" ta Priyanka-isa shisem.

Taruba Assam Assembly elections ya tetsürtem atema kanga tongtipang lir. Nenok ket nung vote enoktsütsü tashi lir anungji iba tashiji tebilemsü khuret bena amshiang, ta laisa ayongzük.

2019 National Crime Records Bureau (NCRB) ajanga India nung tetsürtem dak tashiyim mapa timtiba inyakba state ji Assam ta bushitetba osang metetdaksüoo. Iba ya küm asem atongtepa arur.

# Guwahati nung LPG cylinder ka nung sen 25 tuogo

**Guwahati, March 1 (Agencies):** Hombarnü non-subsidised Liquefied Petroleum Gas (LPG) cylinder jenjang sen 25 tuogo. Iba ya anogo pezü tsüingda LPG jenjang tanabenbuba aturba lir.

Tang Guwahati nung seret 14.2 LPG cylinder jenjang Rs 868 alitsü.

Tesüiba anogo ishika tejakdang February 25, 2021 nü tesüsa LPG jenjang sen 25 timba aküm.

February ita nungi LPG cylinder jenjang atuba sülen February 25 anogo jenjang temlokba ya tasembenbuba liasü.

February 4 aser February 14 anogotem LPG cylinder jenjang tua liasü. Yaküm December ita nungi LPG jenjang meilungi atutsü tenzük.

December 1, 2021 nü non-subsidised LPG cylinder jenjang Rs 594 nungi Rs 644 timba aküm. Hopta ana sülen December 15, 2021 nü LPG cylinder jenjang Rs 644 nungi Rs 694 atu.

Yaküm December ita LPG

cylinder jenjang nung Rs 100 tashi tuogo.

Taküm January ita LPG jenjang atuba osang meliasü, saka February ita ano LPG jenjang asemben tashi atutsü tenzük.

Hombarnü, Ato Kilonser Narendra Modi-i mezüing Covid19 mozü agiba den atishia, opposition telok Congress-i pa aitsü aser LPG cylinder jenjang atuba den anogoshia osettsüset tem jenjang atuba indang injection tanga ka nübur nem tuloktsüogo, ta Congress-i Modi luja jembli.

"BJP nungi 'Jenang Atuba' indang 'injection dose' Janta nem tuloktsüogo," ta Twitter sabang ajanga Congress national spokesman Jaiveer Shergill-i metetdaksü.

"Cylinder jenjang ano Rs 25 agi timba kümdakja, ita ana tsüingda trokbenbuba atonga LPG cylinder jenjang atur alitsü. GDP (Gas Diesel Petrol) jenjang yamai amketa atuba ya 'The Great Robbery' ama bendanga amshitsü akok," ta Shergill-isa ashi.

# AR-i Churachandpur nung mozü shibelener 4 apu



**Imphal, March 1 (Agencies):** Manipur kübok Churachandpur district nung Assam Rifles-i ozüing alema mozü shibelener nisung pezü puogo.

Iba tesem mita aoba mapang Assam Rifles sepaitemi sen crore 1.26 alang mozütem apu.

AR-i ngutetba mozütem rongnung heroin gram 390, opium seret 8.96 aser WIY süngjang 396 dena lir.

Iba dak sendakba nung

Assam Rifles-i nisung pezü apu aser parnok ket nungi ngutetba mozü ajak police nem agütsüogo.

"Churachandpur district, Manipur nungi Assam Rifles-i mozü shibelener nisung pezü ket nungi sen crore 1.26 alang mozütem apu. AR teloki apurtem aser parnok ket nungi ngutetba heroin gram 390, opium seret 8.96 aser WIY süngjang 396 ajak police ket nung yutsüogo," ta Assam Rifles-i Twitter ajanga

lemsatop.

Ano, February 28, 2021 nü Manipur nung Assam Rifles den Manipur Police longjemer Bishnupur district nungi sen crore 1.2 alang heroin apu.

Maneni, February 26, 2021 anogo nunga Thoubal district nung Assam Rifles aser Manipur Police nungi teshimtet nübu longjemer sen crore 200 alang brown sugar seret 87.5 aser liquid brown sugar litre 26.5 shi puogo.

# GIPS Tezpur nung National Science Day mungogo

**Guwahati, March 1 (Agencies):** Linük nung tesem ajunga den liromedema, 'Raman Effect' ngutetba nungtem nung Girijananda Chowdhury Institute of Pharmaceutical Science (GIPS) Tezpur nung National Science Day mungogo.

Sir CV Raman-i ngutetba Raman Effect bilemteta, India nung küm shia February 28 ya National Science Day amunger. Raman Effect ngutetba atema 1930 küm CV Raman-i Nobel Prize angu.

Iba sentong nung Tezpur University indang department of Chemical Sciences, Prof. (Dr) Utpal Bora tongti tesemdang aser Defense Research Laboratory indang scientist-F Dr. Pranavesh Chattopadhyay tetushi tesemdang ama dena liasü.

Tezpur nung tasen lapokba pharmacy institute principal, Prof. Dr. Abdul Baquee Ahmed-i tongti tesemdangertem pela agizük aser iba anogomung amungba indang nükjidong telok dang metetdaksü. Sentong nung tongti

tesemdang nisung anati jembia liasü aser tenati GIPS Tezpur indang kaketshirtem ayongzük.

National Science Day anogomung nungtem nung, 'Science technology and innovation' omen nung ajemdaker inter-college prize money art tetoktepa sentong ka ayongzüka liasü.

Sonitpur district aser kidanger district tem nungi science College balala nungi kaketshirtem 30 dak temai iba tetoktepa nung shilem agiogo.

Art tetoktepa nung, GIPS Tezpur indang Siddhant Sharma-i mezüingbuba jenjang nung takok angu.

Kaliabar College nungi Jenny Saikia-i tanabuba aser Kashyapi Koushik-i tasembuba jenjang angu.

Iba sentong tembanga Uddhav Patangia, convenor aser sentong indang co-convenor Sandipan Chowdhury nati tepela anküp o jembli.

Kasa anogo (Deobar) GIPS Guwahati nunga National Science Day mungogo.



**Hombarnü Aizawl Municipal Corporation (AMC) nung councilor tasen nisung 19-i tezüngzüktepa agiba sülen agiba noksa angur. Tanü municipal office nung Aizawl district magistrate R. Lalramnghaka-i councilor tem tezüngzüktepa agidaksü. Mizo National Front (MNF) councilor Lalrinenga Sailo-i mayor aser MNF nungisa R. Thanglura-i deputy mayor inyaktsü shimogo. (Aizawl, March 1)**



# TIR YIMYIM

## YIMOBILEM (EDITORIAL)

DIMAPUR SANGTENNÜ, METSÜREMI (MARCH) 02, 2021

### PEI KIDANG OSHI SAMAR

**T**anü asüng putu ya alima rangben agi yimtsüng ka ama kümer aliba mapang lir, anungji alima nung alir kin aser oshi ajakji asen kin aser asen yimer oshi amato kümer alitsüba mapang lir. Iba jagi tashitemetetter aser tashi taitba kintemi jembiba oshi agi kin tila aser teküpbok tia nung alir nübortemi jembiba oshi aika amoksepdaktsür. Meimchir yimya agi, ajaki takar aser temetetter jilu ajizüka linür, anungji aiben tilar aser sensakertemi takar aser temetetter kintemi benshiba yimya aser jembiba oshi sülen aotsü merangdang, pei sobaliba aser oshi amadoker aser tangar kin sobaliba aser oshiang tesabuba akümer. Tanü asenok Naga nungertem aser talisa, Aortem rongnunga, pei tetsü oshi sapua jembitsü melen English-ang tesapuba aser Nagamese-ang tesapuba ta jembiba ya asen dang nungi English aser Nagamese jembirtemji tashiba aser temetetba asüba agi, parnok jiluji ajizüka alitsü merangba jakla sayuba ka lir. Iba jagi asenok ama tangar memenepba kin aser nübortem sobaliba aser oshi memeteti küm ishika tsüngda tejembir kata mali samadaktsür. Atangji, tangar tashir aser temetetter kintem oshi aser sobaliba tajung angazüka benshiba aser jembibaji junger, iba jagi tashir temetettertemji menepa asenoka libaliro aika nung renloktsü, saka tangar ama tajung akümtsü merangdang asen lipok, asen oshi aser asen sobaliba amadokra asenoksasa asenok tesamalen aoe asütsü. Alima tesem kong lidir liaka, Lashiba nunga Yisu jakzükba kidong otsü tarensena zülua aliba amato, asenoka kong nungi jakzük, kechi kin aser kechi oshi jembir ta asübaji alima mesama tashi asenok ayak aser temeten asütsü. Ibayongji, tanü asüng ya balaka asenok rongnung asen tetsü oshi mesamadaktsü wazüka ayuba dang masü saka renlokda kja jembitsü asoshi ajungshiteper. Aji oda, tangar dang masü, asenoka tang ya asentenshia asen tetsü oshi sapua jembitsü metenzükra, taruba küm noklang ka sülenbo alima nung Ao oshi jembir züngdangteta dang asütsüsa asenok kibong aser loti tia kati idagi. Joko, tang ya lanur kibong aika nung tsüraburtemi Ao mashi, anungji English aser Nagamese dang jembir, anungji 2050 küm alima anitsü pur par chir chirtem jagibo Ao kenyongi mangateti akümtsü. Aji oda, taruba küm 80 tsüngda tang Ao junga jembir, asenok ajak ya sümadoaktsü. Idangjibo, tang amaisa ora, kidang dang masü saka lokti, arogo aser yimden senden ajak nung Nagamese aser English agidang jembitsü. Tanga town-tem nungbo lanurtem sentep aser senden nungbo aikati Ao mejembir. Ibaji asenok asoshi shisabolutsüka lir. Kodang iba shisabolu tenzükba tesem aser mapaji bushia odir, ibaji tanga tesem nung masü, pei kidang aser pei kibong nungi tenzükba asütsü. Mapang ka kibong tasen ka nung tanur anepalutsü asoshi tangalen nungi tangar bendanger chanu ka anir arua kidang lidaktsü. Iba nisung nemji dang tanurji toktsür tsürabur anaprongla anogo shia pei mapai oli nikongtsütsü dang aruli ta süa tanurji tain aküm, anungji kidang tanur jagi pei tsüraburi jembiba oshi masü saka pa anepalusangi jembiba oshiji dang jembir. Iba denji ano anogo piyong tv repringba agi tv nung aruba oshi dena kanga junga angazük saka pei tetsü oshibo kenyongi mejembitet, kechiyong aji pa dang mesayu. Iba amaji kibong aika nung pei tetsü oshi samaogo. Iba tebilemstüji repringteta taoba hopta nung asenoki asen Ao oshi renlokda ktsütsü atema, Aor kibongtem nung teyaritepertem tangar kin nungi masü Aotsür Aortem dang ayu nunga koma süla (?) ta asüba nung shisadangogo. Aji oda, kodang kidang teyaritepertema asen nisung yudir kidangbo Ao dang jembitsü, anungji tanurtemi memeteti pei tetsü oshi kanga junga angazüktsü. Atangji, tangar nisung kidang tak ta mayutsü ta masü saka parnok nem asenok yaridaktsütsü dang bilema masü saka parnok tajung kümdaktsütsü asoshi bilema asenoki ayutsü akok. Ajisüaka, tang nungibo kidang shiba yudir yuang, asen kidang aser asen kibong nungbo asen tetsü oshi dang jembitsüla. Iba jagi asen nem pei lima meimba shisatsü aser aküm ka agütsütsü aser pei tetsü oshi ajangaji dang asen kibong aser asen kinungertem aser asen kin aser nübortem angatettepa longjema alitsü.

# OLEMSABANG

## HORNBILL FESTIVAL - SHIBA AJANGZÜKER?

~ Wati Longchar (Serampore)

(Yashi adok nungi...)

Tourism industry ajanga teraksa aika bener arutsür asü nung takari nübortem longkak maitdaktsütsü atema mapa tajung inyaker amai sayutsü. Ni Marian beach, Chennai nung, Taj Hotel kiburi temeküt nung alirtem asoshi yamai inyakba angu. Ita shia jang kg 5, dal 1 kg aser totzü litre ka agütsür. Iba den primary school ka angopur chirtem züngdaktsütsü? lapoktsü. Kechiba süra Taj Hotel-i 3 kms temüket nung ango mepudaktsür aser angopur mapa mali aküm. Anungji nübortem longkak maitdaktsütsü asoshi mapa tajung inyaker amai sayuba. Kasaji repringang, tourism ajanga hotel, lenmang, airport yamai terenlok bener arutsür ta ashitsü. Saka nübortem shiba ajangzük ta asübaji asüngdangtsüla. Tourism dang sentakba tongmelang agi itemi tebilemstü ya meteta yudi:

- Tourism industry renlokda ktsütsü asoshi lisopur senzüka yutsütsü, parnok alu, arem, tzü tourist atema agiadoktsü; nübortem pei talidak melitetsü aser alu meyimtettsüsa ozüng yanglutsü;
- Tetsür aser tanurtem ashio kja anir oa alar mapa inyakda ktsütsü;
- Pei sobaliba akhümtsübu aser tetezü kecha makai ayoktsü;
- Takar ishika kanga takar akümtsü kechiba süra parnoki hotel, restaurant, transportation ajak azüoka ayutsü;
- Oset-tsüset ajak nung jenjang atutsü aser sensaker timtem aika ajurutsü;
- Azümesener, drugs achir züintsü aser ashikülaker aika adoktsü;
- Alinük (country) shirnok rongsen ketzung nung tashi taitba lir, par kini shishilemba maparen ajak azüoktsü aser lisopur pei lima nung alar süa alitsü, harjiawala akümtsü.
- Shi jangratem bushia jangratem tzü-mopung menentsüba ajanga tashitak balala adoktsütsü;
- Jabujari, nüktapangta mapa balala aika jateta adoktsü;
- Chiyungtsü tajung ajak tourist atema, tamajung lisopur achitsü;
- Lisopur jalatemi takar tourist bushia senzütsü aser parnok temang ayoktsü;
- HIV & AIDS, temesepba mozü achir züintsü;
- Nisung aika anojungi iba lima nungi arishi lepdoktsü.

Item ajak ya lokti tebilemstü. Tourism dak sendakba tebilemstü yanglushiba nung Governmenti, yimtsüng yimsüsü, arogo tenzükuri dang temelenshi bener marutet, anungji nütsüng shia shilem kar ta metettsüla.

Laishiba aser Tourism terenlok

Laishiba nung nungdak balala nung nübortem oli-aruli ta jajaba otsü aika shia angur. Tsüngremi Abram aja. Pa aser par kinunger Haran nungi Kanan lima bushia ao aser yangji tenladak ka yanglu (Lipok 12:1-9). Herod chuba nok nungi kümzüktsü, Yosep aser Mari nati kinü tanur Yisu Egypt limai anir agen aser yangji Egypt nung den ali. Mosa and Aron nati anir Israel nung lji lima alar tia nungi aniteta Kanan limai anir ao. Yamaji aenlen jajaba otsü aika dang lir. Anungji taküm kümzüktsü, taküm jenjang tajungba ngutettsü asoshi alima balala bushia aobaji tim, saka shi jangratem bushia meimchir shishilembaba oset-tsüset amai, Tsüngremi moatsüba sobaliba tetezü makai, aser Tsüngremi yangluba tobur tajung lima mapayui raksaja, menenja senzübaji tai ta Laishibai sayur. Laishiba nung shi jangraba bushia jajaba aser lokti dang teraksa bener arutsüba anema ashiba kuli aika angur.

Meizüngbuba nung, Tsüngremi meimchir - tetsür-tebur - ajak Tsüngrem mesükba nung yanglu (Lipok.1:26-27). Tsüngrem tashi ajanga taküm lidaktsür and taküm ajak Tsüngrem meyong. Tsüngremi yangluba taküm kaji shingaia agientsü makok, akhüm metsübu amshitsü makok; alar ama beshitsübaji tai. Ajak meima, akhümtsübu amshitsüla. Tsüngremi yangluba taküm ka sen yong ayokba aser alar ama amshibaji Lai tesayuba masü. (Anitet 22:25-27, cf. Züng. 15:12-17, 24:6,17). Tajangzük aser shi jangraba atalokda ktsütsü? tetsür dak beshira, sobaliba akhümtsübu mesüi mebenshira, sensaker ashio ktsüra commercial tourism anema noktaktsüla aser jembitsüla. Arogo aser tamanger teloki ibala mesükba ochimashi mapa anema tasü ita ochi nung nokda ktsüla.

Aener dang meimtsü aser aeneria lisopur meimtsü Lai nung yamai angur. Levi kaket nung yamai shia angur, "Ne den aliba aenerji nai senso pur ka ama beshiang. Na ama parnok danga meimang, kechiaser nenok lji lima nung aener süa liasü." (19: 33-34). Aener shirnok asen dangi arur, parnok tashio ktsü, meimang, aser yariang ta ashir. Ano Anitet kaket nungji yamai ashi, "Tangar dang ayoktsü mesüra pei kidang alar ama ayutsü asoshi shibai nisung auyadir, pa atangji sūdaktsütsüla" (21:16). Tenyar Paul-i Rom nung dangi yamai zülü, "Kati ka den meimtepang, saka shinga dang sentsühtsür teküm, kechiyong shibai tangar meimer, pai ozüng atalokda ktsütsü. ... "Nai nüktapangta tebeshi, nai tetepset, nai tauya, nai tenükshi... nai ne kiyonger pei ama meimang. Temeimi kiyonger dang majung meinyaker ..." (Rom 13:8-10) Meimchir tajangzük, takar kar tajangzük asoshi nisung kar alar ama mapa inyakda ktsüba, pei temang ayokba, sobaliba akhüm metsübu ayokba mapatemji tai. Tourism industryji nungdak, saka lisopuri aener dang koma beshir? Aener shirnok rongsen aika akaba yong shi jangratem bushia senzür, parnoki lisopur oset-tsüset ama mamshitsüla, merepringtsüla aser pei shi jangratem atema alitsü memeringtsüla.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Court-i Khristantem nem Ambala Christian Cemetery temeden agütsü



Ambala nung Khristantemi Ambala Christian Cemetery merüktetba noksa nung angur. Tawa Punjab & Haryana High Court-i iba leper nung Khristantem tasü mang aremtsü atema Khristantem nem temeden agütsüogo.

**March 01, 2021:** India nung court kati British nung mapang yangluba leper ka amshitsü atema Khristantem nem temeden agütsüogo.

Putir kati British nung mapang yangluba leper liji pa meyong, ta shia tasü mang aremtsü atema Khristantem nem temeden magütsü liasü saka tawa Punjab & Haryana High Court-i British High Commission kübok Ambala Christian Cemetery ji Anglican Arogo nungi putir, Shaukat Masih Bhatti meyong masü, ta obendang agütsü.

Arogo lenirtem kari ashiba agi, küm ka tejaklen cemetery management committee nung Bhatti Chairman shima liasü, ajisüaka pai tashi amshia iba leper nungji Khristantem tasü mang aremtsü memelai pa sünütsü süogo.

Ambala cantonment nung aliba cemetery ji küm 176 dak tema lir.

Yimti nung denomination balala ajak senteper Khristan nütsüng 4,000 dak tema lir aser Khristantem tasü mang aremtsü atema iba cemetery ji dang, ajisüaka putir, Bhatti-i Khristantem tasü mang iba cemetery nung arembaji nokdanga liasü, ta Ambala nung aliba Holy Redeemer Catholic Arogo nung putir, Antony

Chacko-i metetdaksü.

Putir Chacko-i dang masü saka yimti nung denominations balala nungi Arogo lenirtemi Haryana state sorkar dang putir, Bhatti-i ali acre 20 indang cemetery atsünga agibaji sorkar nem nokdangdaksüner, ta mepishia liasü.

Khristan lenirtemisa sorkar dang cemetery nungji putiri kiojentem asü baji nokdangtsüla, ta mepishi. Iba leper nungji India nung aser British nung lakh 2 dak tema rema lir, aser World War I mapang asür British nung sepai 66 tasü mang-a rema lir.

1949 küm nungi tenzüka Ambala yimti nung Khristantemi committee ka tenteta British High Commission indang telatetba kübok leper ji ketdangtsüa arur, ajisüaka tang putir, Bhatti-i iba leperji pa meyong akümtsü merang.

Cemetery liji India sorkar meyong, ajisüaka tang tashi iba ali temedenji British High Commission nem agüja lir. 1933 küm iba cemetery ya wazüka ayuba tesem ka asütsü sangdonga liasü, ajisüaka yimti nung Khristantem tasü mang aremtsü atema leper maliba agi iba leper nungji Khristantem aremtsü atema temeden agütsür.

Mapang shia iba cemetery

dak sendakba mangatetep adokba sülen court nung iba ken o angadanga Bhatti nem iba ali temeden magütsü aser January 12 nü ano Cemetery committee ka tentetshia liasü.

Iba obendang anema Bhatti-i state High Court nung temepishiba ken o benok, ajisüaka court-i magizük. Court-isa iba ali atsünga agütsü atema British High Commission nem temeden agüja lir, ta metetdakja liasü.

Iba cemetery ya Commonwealth War Graves Commission (CWGC) nung züngoka lir.

February 8, 2021 nü CWGC ketdangsertemi iba leper semdanga leper yanglushitsüogo aser local management committee-ia leper telongtet jara yanglushiogo.

February 26, 2021 nü osangbener den jembidang putir Chako-i, "Khristantem kanga pelar, kechiyong tang nungibo onoki kecha tetsükdaksü makai tasü mang remtettsü. Tasü mang aremtsü atema leper maliba agi ozü nüburtem kanga shisabulua liasü, ajisüaka tang court obendang ajanga tebilemtsü ajak bentetogo," ta ashi.

Putir, Bhatti-i maneni High Court obendang anema Supreme Court nunga ken o agütsütsü tebilemba lir.

## Khristan lenirtemi UP nung anti-conversion anema ola adoker

**March 01, 2021:** Tawa Uttar Pradesh nung anti-conversion ozü ng tasen ka benokba anema state nung Khristan lenirtemi ola adokogo.

Iba ozü ng kübok state sorkari tamangba yimsü meyipba dak sendakba temzü ng ajak yanglushitsü aser aibelen nung ajemdaker temerenshi balala agütsütsü.

February 24, 2021 nü Uttar Pradesh Legislative Assembly nung Uttar Pradesh Prohibition of Unlawful Religious Conversion Bill 2021 agizüka liasü, aser iba ozü ng kübok nisung kati tamangba yimsü

meyipnüra sorkar dang nungi temelaba meshia anogo 60 jelia shidi agütsütsüla.

Iba ozü ng kübok aibelenertem küm 3 nungi 10 tashi tepoukdak ayutsü akok aser senchi 25,000 tashi achitsü.

Lucknow nung osangbener den jembidang Lucknow nung aliba Arogo nung putir, Gerald Mathias-i, "Anti-conversion ozü ng ya tamangba yimsü ajak sadoka amangtsü, beshitsü aser proksü temeden alema lir," ta metetdaksü.

India linük temzü ng kübok Arrla 25 ajanga linük nung senso ajaki peii melungba yimsü

amangtsü aser beshitsü temeden agüja lir, ta pai ashi.

"Nai tanga tamangba yimsü ka dangi meyipnüra magistrate dang nungi temelega meshitsüji tesü ng mangtsüka lir. Iba ozü ng ajangasa tamangba yimsü balala amanger ana kibong mekümtettsü, aser ibaji ajanga apuani shimtsü atema tain ka nem temeden magütsür," ta pai ashi.

Putir, Mathias-isa, iba ozü ng kübok Hindu yimsü dangi tanaben meyiptsü atema tenokdanga mali, iba ya ajanga Hindu yimsü alia amangertemi Khristantem aser Muslim nung amokmerentsü, ta ashi.

## ANO GO ABEN TSÜNGREM DEN

### Takok otsü

Mathi 20:17-28

Aser sorobangru nung nisung ama kümer, pei sasa ajemalu küma, tasütsü akok, oda kangki nung asütsüa tashi anga aküm. Filipi 2:8

Süjen nungi takar tashi office tanür nungi nisungi takang president tashi süngtüm taktang nungi White House tashi- item ya America nung tulu akümba takok otsütem lir. Ken ken asenoki tulu akümtsü bilemer. Kodang akümtsü? ta kü sasa asü ngdang. Nai takok angutsü asü?

Idangji ni Kibuba takok anguba otsü bilemdang. Kotak nungi alima tashi; Takoksang Tebu Tsü ngrem teka tajichilen nungi aluyimer tetsü ka aser Bethlehem nashi su ka tashi; nü ngtuku nungi tesempa agi kangki nung angenloktsüba tashi! Aser item ajak ajanga Kibuba Yisu Pa meketa alir ajak kü mzü ktsü mazü ngi liasü ni angu. Kiyir Benjung parnok asoshi Pai yangluba yi bilemdang; meyerijang pungu dak tali ayi ma nung mener Pa anganüba amtsük aser shii achi; shiranger aika Pai agütsüba tanebtsü agizük; Pa nütsüng 12 chiyongba langbang meketa mener takok asoshi olangtepdang Pai parnok tetsü ng shidoktsü.

Iba sülen ajak asoshi tenzü kba mapa tematibaji aru: sepoytemi Pa menütsü, putirtemi Pa dang Laishiba nungi jembi, aser Pai ajak menen bener kangki nung gojal agi angendang tasü mait nütsü ngtem Pa nungi jena ao.

Ibai asen Kibuba takok otsü. Atangji, Pa ano tasü nungi shia aru aser kotak nung chuba menden nung amen. Saka kodang Pai kangki nungi kodang Pai "Ibai renemogo" ta ayimten Pa tekümtet mission tejangja aküm (Yn. 19:30).

Kibuba Yisu, Tanela Temeshi ain ajanga Ne takokba otsü kü tekümtet tamang aser ajemaluba mapa inyakdakjang. Amen.

## March 7 nü Sri Lanka nung Arogotemi 'Black Sunday' amongtsü

**March 01, 2021:** 2019 küm Iba tatalokba ken o Easter Sunday nung Tenla kitem bushisü ngdanga mapang nung amakba mapang asürtem atema commission-i tenük kuli alir 440 ochi temeden meshia Sri Lanka dang asü ngdangyaa liasü.

Arogoi March 7 nü "Black Sunday" sangdonga amongtsü.

2019 küm kiralongrartemi Khristantem amakba tatalokba bushisü ngdanga telok-presidential commission of inquiry-i agütsüba report agi Khristantem melung masür, kechiyong iba report nungji aibelenertem jangjaba osang mali.

Pitipanam, Negombo nung aliba St. Mary Arogo nung putir, Ranjith Terry Fernando-i, iba lendong nung asürtem atema ochi temeden magütsüba anema putirtemi March 7 nü Black Sunday sangdongogo, ta metetdaksü.

"Kiralongrartemi amakba mapang asürtem aser samartem atema temeden magütsüba anema longkak aita onoki Black Sunday sangdong," ta pai metetdaksü.

2019 küm Easter Sunday nung Islamic kiralongrar telok-National Thowheed Jamath nungi zü ngsemtemi Sri Lanka nung Arogo asem Tenla ki aser

hoteles asem bomb amshia amakba mapang nung Khristantem aser bendangertem timba ser nisung 279 shi asü.

Iba tatalokba ken o bushisü ngdanga mapang nung commission-i tenük kuli alir 440 dang asü ngdangyaa liasü.

Putir, Fernando-i Khristantem dang Black Sunday nü Khristantemi süoshi tanak semer Tenla kidangi arutsüla, ta mepishia metetdaksüogo. Iba anogo nungjisa temeja sarasadem ka agitsü.

"Black Sunday amongba sülen ano sentong aika agitsü.

Takoksa angurtem nem temeden magütsü, anungji commission indang report ya mabensa," ta pai metetdaksü.

Colombo nung tongti putir, Malcolm Ranjith-i sorkar dang presidential report ji parnok nem-a agü jang ta mepishiogo. Commission-i iba report ya February 23 nü Parliament Speaker nem agütsüogo.

Linük Tir, Gotabaya Rajapaksa-i iba report repringshitsü atema Tourism Minister Prasanna Ranatunga nem mapa nunglokja liasü aser minister-ia pai iba report agi melung masür, ta shiogo.

Minister-i, "Onoki iba report ashishir. Lendong agütsütsü atema asalentong yanglur tongtiji Commission-i meputet asü? Mesüra nenoki mimshir? Iba report agi ni melung masür," ta metetdaksü.

**OLONG PAITEP # 5740**

1			2			3			4
			5		6		7		
8									
			9						
	10								
								11	12
			13				14		
15						16			

**TIPLÉN**

- 1. Anenzükdak ki - (5)
- 3. Asür mangyimba - (5)
- 5. Temulung nung shisadang - (5)
- 8. T \_ \_ \_ lu - (3)
- 10. Takdang temalen - (9)
- 11. Tesa \_ \_ \_ a - (3)
- 13. Ajungbena temulungjang tongtonglatsü atu - (5)
- 15. Tejen lai nung tesayur - (5)
- 16. Tsüngsak-mopung - (5)

**LANGTSÜNGLEN**

- 1. Reprangdaksü - (4)
- 2. \_ \_ \_ ur - (3)
- 4. Kiojen yangludak - (6)
- 6. \_ \_ \_ \_ \_ ait - (7)
- 7. Nagaland nung ayong ka - (5)
- 9. Küm kasa purtem - (5)
- 10. Tetsüng tajemetdak - (6)
- 12. \_ \_ \_ \_ adenshi - (4)
- 14. Tsünüsenbongtsü adokdak - (3)

**OLONG PAITEP # 5739 TELANGZÜBA**

**TIPLÉN :**

- 2. Anükalem, 4. Mesak, 5. Apet,
- 9. Meimtep, 11. Posü, 12. Patak,
- 13. Tekettsü.

**LANGTSÜNGLEN :**

- 1. Kündang, 2. Ayak, 3. Leptep,
- 6. Sati, 7. Yiar, 8. Sangküm, 9. Metsük,
- 10. Mazü.



**SOPANGBA KANGA SÜNGMANGSETER ... !!!**

**Sopangba :** Ohooiii...Temba, ni kanga rata-mataa süngmangba olen kar süngdangdi, Na azünga dang lir sudi...???

**Alokba :** Ayaaa...Kechiba mazüngtsü aka...CORONA-a ta... COVID-a ta ajaba wara ya tsübuba agi kechalen-ia mooteti kidang dang moka kazür nung koda. Na kechi asüngdangnur'ar odang asüngdanggangjaii.

**Sopangba :** (1) Ena...Temba tangbo terakabo lapokogo, saka kanga sashia shipangba mapang nung to, Assam ajanga asenoka mooteter, aser tangar-a maruteter ta sernung, Rum-Whisky-Beer...bottle-bottle... case-case...load-load bener arua ayokba to kolen nungi bener arur'ar kanga süngmanger ajaa...!!! (2) Ano Naga lima nung Yi & Drug shibelena ayoker apoba ya Assam Rifle-temi dang teimba apoba osang kakat nung adoka angur... Surabangla asen Naga lima nung Assam Rifle dak alaka tanga sepoy-bo tanuker mali asü koda ???

**Alokba :** Oooh...Temba...Na kecha tesüngmang....Asen Naga lima ya Khristan lima asüba agi Ram - Whisky - Beer - Drugs-ji Nagaland telungi sayatenya nung tashikang dener yimoka aiter sulabaaa...!!!Lilir : L.

Lilir : Kika Pongener.

**TANÜBO NAI LANGZÜANG**

Q. Karapat Wildlife Sanctuary yagi square kilometer \_\_\_\_\_ shi ayimjemer.

- A.175                      B.176                      C.177                      D.178

\_\_\_\_\_ (Taruba adok nung onoki langzüsü)

**YASHI ADOK TELANGZÜBA :** Mumbai

**AO OSHI ANGAZÜKDAK:**

**TANÜ ANGAZÜKTSÜBA OJANG**



Tir Yimyim

**Aam** = (n.)somomo tu, chi aon atemba tu.

(Banana leaf or large wild aspidistra type leaf)

\* Benjong nung chitem atemtsü atema lanurtem aam arepi ao.

**Aam** = (n) Sotba (hold)

\* Kübui kü teka nung aam

**NAI-A YA METETTER MA?**

**NETFLIX SABANG AJANGA SAYUTSÜ ALIBA MOVIE**

**ASER TV SHOW TEM: MARCH 2021**

**\* Movies**

- 3 March - Moxie
- 5 March - Dogwashers
- Sentinelle
- 8 March - Bombay Rose
- 11 March - Coven of Sisters
- 12 March - Paper Lives
- Yes Day
- 17 March - Simply Black
- 18 March - Get the Goat
- 25 March - Caught by a Wave
- Secret Magic Control Agency
- A Week Away

**\*\*TV Series**

- 2 March - Men on a Mission season two (plus weekly every Tuesday)
- 5 March - City of Ghosts
- 10 March - Dealer
- Marriage of Mortgage
- 12 March - Love Alarm season two
- Paradise PD season three
- The One
- 15 March - Zero Chill
- 19 March - Country Comfort
- Formula 1: Drive to Survive season three
- Sky Rojo

**SUDOKU # 5781**

**TELANGZUBA # 5780**

						9	8			1	4	8	3	5	7	6	2	9
	4		2		7	5				3	9	6	8	4	2	5	1	7
	7	9	1		6	3				2	7	5	1	9	6	3	4	8
6			9		8					9	6	1	7	8	4	2	5	3
	9	1	6	2				4		5	8	2	6	3	9	4	7	1
	2			7	1					4	3	7	5	2	1	9	8	6
9	1		4	3	5	2				6	5	4	9	1	8	7	3	2
3							1	7		7	1	3	2	6	5	8	9	4
2			7							8	2	9	4	7	3	1	6	5

**OJANG LUTEP # 5327**

KONYIMGI :

MNGBULUA :

RENMAPA :

NNUG :

NUKIJAI :

KOTENG :

MEBAJRANGI :

JOKAMA :

ANDG :

ÜMEAKR :

**OJANG LUTEP TELANGZÜBA # 5326**

**PEI AJANGZÜKTSÜ TEJANGJA KULI NGUA METETER SÜLEN TEKA SALAA YARITEP**

**TAN HOPTA ATEMA - KOMA SÜLA ?**

Q. Nagaland nung yi ayokba dokan odia lapokdaksü nunga koma süla?



March 1, 2021 nü Patna nung Inqilab Naujawan Sabha aser All India Students Association (AISA) züngsemtemi shisaliok aser health tsütsü sorkar anema longkak aيتدang police-i parnok dak tzü khaloktsüba noksa nung angur.

### Tamil Nadu nung AIADMK-i BJP nem menden 21 agütsütsüa akok

Chennai, March 01

(Agencies): Tamil Nadu nung assembly election agütsü mapang ana nung lia Chief Minister, Edappadi K Palaniswami aser Deputy Chief Minister, O Panneerselvam nati Amongnü BJP lenir aser Union Home Minister, Amit Shah ajurua AIADMK-i aniba teloktep nung menden alemtsü atema jembiogo.

Amongnü aonung 10:00 ako nungi tenzüka ayaterm tashi Chennai nung aliba hotel ka nung parnok senden mena liasü.

AIADMK telung osang ka ajanga ashiba agi, parnoki BJP state Tir, L Murugan-i aniba telok dang iba teloktep nung partner tulutibaji PMK süner, anungji BJP nem menden 21 tashi dang agütsütettsü ta shiogo.

Osang angazükba agi, AIADMK lenirtemi anogo ka-ana tsüngda teloktep party tem tsüngda menden lemsaba maparen tembangner.

Senden nungji BJP national general secretary, B L Santosh, Murugan aser AIADMK nungi MP, P Raveendranath Kumar nata densema liasü.

BJP ket nung taoba elections nung parnoki votes junga anguba constituency 60 liasü aser parnoki menden 60 nungjagi toktepnüba dang masü saka PMK dang nungi menden timba aginer. AIADMK-i PMK nem menden 23 agütsütsü ta shiogo.

Iba teloktep nung tongti, AIADMK-i menden 170-180 nungi toktepnur aser parnok kijai menden peria ngua sorkar kümmer.

Ano külen DMDK nungi züngsem aseme akümbe team nung presidium chairman V Elangovan, propaganda secretary Alagapuram R Mohanraj aser deputy secretary B Parthasarathy nung lir, aser parnoki ministers P Thangamani aser S P Velumani na den senden menogo.

Honibar aonung minister ana jagi DMDK lenir, Vijayakanth'er kidangi oa senden ka menogo. Honibarnüsa Kallakurichi nung party lenirtem den jembidang DMK treasurer, Premalatha-i, "Asenoki shinga den-a meloktepi toktepyonga vote shilem 10 dak tema angutsü. Ajisüaka takok angutsü atema Captain (Vijayakanth)-i party kar den teloktep yangluner," ta metetdakja liasü.

### RJD-i Trinamool Congress yaritsü: Tejashwi Yadav

Kolkata, March 01

(Agencies): West Bengal nung Assembly elections agütsü mapang ana nung lia Hombarnü RJD lenir, Tejashwi Yadav-i Trinamool Congress (TMC) tongti, Mamata Banerjee ajurua senden menogo.

West Bengal election nung RJD-i tokteptsü aser metokteptsüar mejangja, ajisüaka Tejashwi-ibo, pai West Bengal nung dang masü saka Kerala densema election agütsü aliba state tem nung BJP anema

nübo yimtsütsü, ta metetdaksü. Tamalen pai Assam assembly election nungbo RJD-i tokteptsü ta metetdaksüogo.

Hombarnü Tejashwi-i Bengal nung nüburtem dang TMC nem vote agüjang ta mepishiba den külemi "secular" party tem danga BJP anema lokteper tokteptsü ayongzük.

Kolkata nung aliba state secretariat nung West Bengal Chief Minister aser TMC tongti, Mamata den senden amenba sülen osangbenertem den

jembidang Tejashwi-i, par party atema tongti nükjidongji West Bengal nung BJP nokdangtsü atema lir, ta ashi.

RJD-i TMC den lokteper tokteptsü asü? ta osangbenertem asüngdangba langzüdang pai, "Ozü party-i akokba tashi Mamata'er party yaritsü," ta shia West Bengal nung alir Bihar nung ajak dang TMC yaritsü mepishi.

Mamata-ia, RJD tongti, Lalu Prasad tena tsüngda akhümtsübutep lir, ta ashi.

### PM Modi-i vaccine agiba agi tatishitsü tajung sayuogo: Harsh Vardhan

New Delhi, March 01

(Agencies): India linük tesem ajaklen arrshi küm 60 aser iba dak tema teintet sensotem nem coronavirus vaccine agütsü tenzüka anogo (March 1, 2021) nung Ato kilonser, Narendra Modi-i tama coronavirus vaccine agiba agi pai tatishitsü tajung sayuogo, ta Health & Family Union Minister, Harsh Vardhan-i metetdaksü.

Health minister-isa opposition lenirtem dang coronavirus vaccine agiba ajanga nüburtemi vaccine agütsü arendakba anendaktsüba nung yaridaktsüner, ta mepishia metetdaksü.

Paisa, "Asenoki yangluba vaccine anaprongla ya tajung, ta ni tamasayongi jembia arudar. Onoki Ato kilonser dang pelar, pai teti onok dang asenoki tatishitsü sayua anitsüla ta shia arur. Arrshi küm

60 ser temapurtem vaccine agiba anogo nung pai tama vaccine agiogo," ta ashi.

Hombarnü Ato kilonseri tama Covaxin vaccine agia liasü. Iba vaccine ya Bharat Biotech aser Indian Council of Medical Research nati senteper yanglu.

Tesülen Modi-i twitter ajanga, "AIIMS nung ni mezüngbuba dose agiogo," ta ashiba den külemi noksa-a ka lemsatep.

"Alima nung coronavirus anema raraba tashi itdaktsütsü atema asen doctor tem aser scientist temi kanga junga inyakogo," ta Ato kilonserisa ashi.

Union Health Minister-i, "Ato kilonser Modi-i Covaxin agiogo. Iba ya ajanga Ato kilonseri linük nüburtem nem osang tejangja ka agütsüogo. Olulu aser tarendakba ajak anentsüla," ta ashi.



March 1, 2021 nü Patna nung aliba Indira Gandhi Institute of Medical Sciences (IGIMS) nung medical personnel kati Bihar Chief Minister, Nitish Kumar nem coronavirus vaccine tutsüba noksa nung angur.

### Aluyimertem nem sabang ano timba agütsütsüla: PM Modi

New Delhi, Metsüremi/

March 01 (Agencies): Centre sorkari benokba aluyimba ozüng tasen asem anema Delhi arrtsülen aluyimertem meyrjang aikati longkak aitba mapang nung Hombarnü Ato kilonser, Narendra Modi-i, aluyimertem alu nungi züsentetbatem ayoktsü atema parnok nem sabang ano timba agütsütsüla, ta ashi.

Paisa, linük nung chiyungtsü wazüka ayuba sector nung asüngsashi tulu nüngdaker; ibaji ajanga aluyimertem züsentetba tsütsü jenjang tajungba akümtsü, ta ashi.

Agriculture Ministry atema lemzüksüba budget tajungtiba nung amshitsü atema webinar sentong ka nung jembidang Modi-i, aluyimba sector nung research & development (R&D) work densema nija sector temi shilem agütsüla, ta ashi.

"Linük nung aluyimertem alu nungi züsentetbatem ayoktsü atema parnok nem sabang timba agütsütsü nüngdak," ta pai ashi.

Union Budget nung Agriculture Ministry atema sen lemzüksüba dak sendakba nung pai, agriculture credit target sen

16.5 lakh crore tashi kümtsüogo, talisa animal husbandry, dairy aser fisheries sector nung rangloker sen lemzüksüogo, ta metetdaksü.

Modi-isa Operation Greens kübok train/gari nung süngjanglijang aser aonsotsü belenba nung sen indokba shilem 50 bo sorkari subsidy agütsü; tesüiba ita 6 kija nunga Kisan Rails 350 tashi senzüogo aser item train ajanga süngjanglijang aser aonsotsü metric ton 1,00,000 dak tema belenogo, ta metetdaksü.

Modi-isa, ghonda isap nung aluyimertem nem tractor, straw machines aser aluyimba dak sendakba gol balala hire amshidaktsütsüla, ibaji ajanga tilateri aluyimertem kanga tajangzük angutsü, ta ashi.

Ato kilonseri, Kisan Credit Card facility ya aluyimertem, kiset shiruru mesürtem aser angopurtem nem agütsür, ta ashi.

Tesüiba küm ka tsüngda aluyimer crore 1.80 nem Kisan Credit Cards agütsüogo aser tesüiba küm 6-7 den medemdangra Kisan card ya anasü agi timba agütsüogo, ta pai ashi.



New Delhi, March 1, 2021: Hombarnü New Delhi nung aliba Max Hospital nung coronavirus vaccine atutsü atema teintet sensotem tarensena nokdaka aliba noksa nung angur.

# Myanmar court-i Suu Kyi anema ken o talila ana benok

**Naypyitaw, Metsüremi/March 01 (Agencies):** Myanmar lenir menden nungi atsüngdoker alila Aung San Suu Kyi Hombarnü video conferencing ajanga court ken o jembidak aden, koba February 1 nü mitkartemi sorkar atsüngdokba sülen tang mezüngbuba angur, ta la indang okatsürtemi ashi.

Deobarnü security forces temi longkak aiter nisung 18 tepsetba sülen lendong timtem ajurutsü meteta liaka la busemertem jila aser yimitem nung jaja liasü. Hombarnü Myanmar nung yimti tulutiba, Yangon nung police temi longkak aiter dak tear gas aser rubber bullets khalokja liasü.

Linük yimtiba, Naypyitaw nung okadak jembiba mapang arishi küm 75 tain Suu Kyi temang junga lir ama angu, ta la okatsürtemi ashi. Sorkar atsüngdokba sülen la anema ken o benoka aliba nung bendenloksema ano ken o ana benokogo, ta lai ashi.

"Ni A May video nung angu, la temang junga lir ama nguogo. Lai la indang okatsürtem ajurutsü asüngdang," ta okatsür Min Min Soe-i Suu Kyi dang 'tetsü' ta temeim agi ajaba nüngja amshia osangbener dang ashi.

Nobel Peace sempet ngua alila, shibai National League for Democracy (NLD) anir lir, lar sorkar atsüngdoka külem party lenirtem den külemi la apuba sülen yimjak nung mongudang liasü.

Mezüngbo lai bendanglen nungi ozüng alema walkie-talkie radio trok bener aruba



Yangon, Myanmar nung security forces temi tear gas khaloktsüba nungi longkak aitertem jena aoba mapang tangokba noksa nung angur. Ita ka tejakdang mitkartemi sorkar atsüngdokba anema nüburtemi anogoshi longkak aita arur aser Hombarnü Yangon nung lokti tulu adenshia longkak aita liasü. Deobarnü iba linük nung mitkartemi longkak aiter 18 tepseta liasü.

anema ken o benoka liasü. Iba sülen lai natural disaster law nung aibelen coronavirus protocol tem raksa ta ken o benoksem.

Hombarnü ken o talila ana benokba ya ka colonial putu nung yangluba penal code ka kübok nüburttem tsüputsüsa mesüra aoksadaktsütsüsa osangtsüsang adokba nungi nokdangba aser ka ya telecommunications law kübok benoka liasü, ta okatsüri ashi.

**Ken o ya maneni March 15 nung jembitsü.**

NLD teloki takok anguba November election nung ashikülak mapa inyak ta tai tonglokja mitkartemi sorkar atsüngdokba sülen Myanmar nung rongrong tulu adoka lir, kong anogoshi longkak aitba tensa tali tamajungba akumer, kechiaser police aser sepai temi longkak aitertem

ajembangtsü meranger.

Yangon nung Hombarnü longkak aitertem senshidaktsütsü mechi police temi stun grenades aser tear gas amshia liasü. Iba sülen police temi yimtem nung rubber bullet agi akha aser nisung ka yirua liasü, ta osang ajanga ashi.

Deobarnü police temi tesem balala nung longkak aiter dak injang khalokja nisung 18 tepset, ta United Nations human rights office ajanga ashi.

"Kechi südir süaka longkak aitba manentsü. Yangi onok alir. Iba tesem ya tajung liasü, saka

tangbo onoki prangbong ola angashir aser onok kumzüka mali ama bilemer," ta Yangon nung longkak aiter kati ashi.

Deobarnü azüdokshi atema mitkartemi o kata agüja mali.

Linük northwest tsütsü Kale jila nung longkak aitertemi Suu Kyi indang noksa amer yimtem súa jajaba vaser northeast tsütsü Lashio jila nung yimyim ayimba video tem Facebook nung sayua liasü.

Myanmar nung mitkartemi küm 50 jungnüa yimsü súa arur democracy tsütsü meyiptsü mera agiba mapang mitkar tashi amshia sorkar ya

atsüngdok aser iba maparen asoshi anüolen linüktemi aitsü.

Myanmar züngsema aliba Association of Southeast Asian Nations (ASEAN) nungi foreign minister tem Myanmar ken o nung video meetong ka Mongulbarnü amentsü aser Myanmar mitkar ketdangsur nungi teshimtet nüburtemi jembiba angadangtsü, ta Singapore foreign minister Vivian Balakrishnan-i parliament nung ashi.

Security forces temi tashiyim mamshitsüla, Suu Kyi chioktsüla aser tangatetep asoshi jembishinüa democratic transition dangi meyiptsüla, ta Balakrishnan-i ashi.

U.S. Secretary of State Antony Blinken aser Canada foreign minister Marc Garneau nati Myanmar mitkar maparen aitsü.

Mitkartemi tashiyim amshiba manentsü, anungji linük ajungai telangzüba agütsütsüla, ta UN special rapporteur, Tom Andrews-i ashi.

Mitkar lenirtemi election tasen agütsü nangzüka lir saka tang tashi anogo lateta mali.

Mitkari sorkar atsüngdokba sülen sepaitemi longkak aiter nisung 1,132 puogo aser item rongnung Deobarnü nisung 270 shi apu, ta The Assistance Association for Political Prisoners ajanga ashi.

## Jamal Khashoggi tetongi Saudi Prince merenshitsü akhanger

**Istanbul, Metsüremi/March 1 (Agencies):** Saudi nunger osangbener asür Jamal Khashoggi tetongi Hombarnü, Jamal tepsetba atema Saudi crown prince Mohammed bin Salman memenoi merenshitsüla, ta ashi. United States-i Hokolbarnü Istanbul consulate nung 2018 küm Khashoggi tepsettsü atema temelaba agütsüba asoshi crown prince yimjak nung aitsüba osang ka temai adokdakttsü.

Ajisüaka United States-i arishi küm 35 tain lenir nem tenokdangba agütsütsü nungi atsüanem aka.

"Crown Prince shibai taimaketba nisung ka tepsettsü atema tetuyuba agütsü, pa

memenoi merenshitsüla," ta Khashoggi tetong Hatice Cengiz-i English aser Arabic oshi nung tweet asü. "Iba ajanga onoki Jamal atema ochi obendang ka akhangba atalokba dang masü saka tarutsü nung iba amala maparen inyaktsü aliba nokdangtsü," ta lai ashi.

Khashoggi ya US nung lia liasü. Pa ya Prince Mohammed aitsür ka aser pa Washington Post osangbener ka liasü. Pa Cengiz den kibong akümtsü atema kuli kakat kar abeni Istanbul consulate-i aiba sülen tepset.

"Ochi koba jangjar liasü iba ya tanaben temai adokogo aser tang ken o ajak Jangjaa kümogo. Ajisüaka aji teperi masü.

Temerenshi tapet agütsüba sülenang ochi obendang agütsüba jangjatsü," ta lai ashi. Cengiz-isa, crown prince memerenshira iba ajanga nisung tepsetba nung aija alir ka jenbotettsü ta angatettsü aser iba ajanga asenok ajak lendongbang nung toktsütsü, ta ashi.

Saudi sorkari mezüngbo Khashoggi indang kecha memetet ta ashi, saka tatsüka lir pa tepsetba taittsüba parnoki agizüker ta ashi, ajisüaka iba ken o nung prince sendaka mali ta ashi. Saudi foreign ministry-i Hokolbarnü US-i Khashoggi tepsetba dak sendakba nung osang temai adokdakttsüba aitsüogo.

## US aser Europe den sensak asemtsü atema mapang matong: Iran

**Tehran, Metsüremi/March 1 (Agencies):** Donald Trump-i sentoka toktsüba 2015 nuclear deal bangdaka aliba dak sendakba nung Biden administration aser European linüktem den sensaksemtsü atema ano mapang matong, ta Iran foreign ministry-i ashi.

"US/E3 jenjang aser inyakyim apir senden amentsü asoshi benoka aliba atema ano mapa matong," ta Foreign Ministry otongdar Saeed Khatibzadeh-i tweet asü.

"U.S-i tenokdangba balala agüja onok nongshiba magini, langbang ka nung asendenshir mementettsü," ta Khatibzadeh-i Tehran nung Hombarnü ashi.

Iba tenangzüktepba asüngsashitsü atema US tir Joe Biden-i, Iran aser iba tenangzüktepba nung sendaka aliba linüktem senden ka amentsü ayongzükgogo, ajisüaka linük ana tsüngda shibai tama jenjang agütsü aji mejangja.

Trump-i tenokdangba agütsüshir aliba Iran-i US nem agindaktsüner aser kasa mapang

nung Biden-i Iran nem tenangzüktepba kübok nuclear dak sendakba nung parnok inyaksangshitsü atema tetuyuba agütsür aliba sülen tamasa tashi angaa anidakttsüner.

Taoba tir Trump mapang tuguadokba sülen anogo 107 lir February 19 nü US tanaben Paris climate accord nunga denshiogo.

Iran Foreign Minister Mohammad Javad Zarif-i, taoba ita ashiba agi, European Union foreign-policy tekolakba Josep Borrell-i, US aser Iran-i agütsü nüngdakba jenjangtem ajak asameyanga liasü.

Zarif olen ajanga iba tenangzüktepba dangi meyipa aotsü atema linük anapronglai mapa ka nung jenjang agütsü ama angatetogo. Linük ana tsüngda iba ita sensak asemtsü imlar.

Iran-i parnok indang nuclear sites tem semdangtsü atema tenokdangba agütsüogo aser ita asem atema dang mapang bendenloktsüogo, ta global atomic watchdog-i Deobarnü metetdakttsü.



Dhaka, Bangladeshi nung longkak aitba mapang kakershir aser police tem raratepba noksa nung angur. Kakat zülur Mushtaq Ahmed tepuokdak asüba aija Hombarnü Bangladesh yimtiba nung kaketshir 300 shi longkak aita liasü. Digital security law nung aibelenogo ta tai tonglokja taoba küm Ahmed ya pua liasü.



## Golden Globe Award 2021: 'Nomadland' aser 'The Crown' nati award timba angu

**California, Metsüremi/ March 01, 2021 (Agencies):** Taküm 78buba Golden Globe sentong nung terepranger/telok medeni virtual ajanga agiogo, kong actor Tina Fey aser Amy Poehler nati New York aser Los Angeles tesem nungi iba sentong ketdangsüa (host) liasü. Tina aser Amy nati iba award sentong nung pezübuba host shilem agir alitsü.

Alima ajunga asüingba COVID-19 wara agi cinema aser television nung tetsükdaksü/tenokdangba ajuruba ajanga taküm 78buba Golden Globe Awards sentong ya ita ana tashi anogo atsülanger sülen agir.

Taküm Golden Globe Awards sentong ya mezüing bi-coastal ceremony ka liasü, kong New York City kübok Rainbow Room nung Tina Fey aser Beverly Hills, California kübok Beverly Hilton tesem nung Amy Poehler nati iba sentong ketdangsüa agi.

Netflix indang British royal family otsü nung ajemdaker yangluba series - "The Crown" ajanga category shia nung award takok angu, kong 'best drama TV series' densema award pezü nguogo.

Ano Netflix show tanga ka - "The Queen's Gambit," ajanga best limited series; kasa mapang star Anya-Taylor Joy-i drama TV series category nung best actress award angu.

Deobarnü aonung (28.02.2021) Chloé Zhao-i "Nomadland" atema best director category nung award ngua iba award agizüker tetsür director rongnung la tanabuba küma otsü yangluogo. Iba den külemi Nomadland ajanga best drama motion picture award nguogo. Best comedy motion picture award ya "Borat Subsequent MovieFilm"-i angu, kong iba film nung tongti shilem agisang Sacha Baron Cohen-ia best comedy actor award takok angu.

Asür Chadwick Boseman nema best drama actor award (posthumous award) agütsü. "Ma Rainey's Black Bottom,"

atema Boseman tentung nung pa kinungstüi temulung raksa iba award agizük.

Kasa sentong nung "Schitt's Creek"-i best comedy TV series aser "The Mauritanian" atema actress tejen Jodie Foster-ia best supporting actress award nguogo.

\* **Golden Globe Award 2021 takok angurtem yamai alitsü :**

- Best Motion Picture - Drama  
"Nomadland" (Searchlight Pictures)

- Best Actress in a Motion Picture - Drama  
Andra Day ("The United States vs. Billie Holiday")

- Best Actor in a Motion Picture - Musical or Comedy  
Sacha Baron Cohen ("Borat Subsequent Moviefilm")

- Best Director - Motion Picture  
Chloé Zhao, "Nomadland" (Searchlight Pictures)

- Best Actor in a Motion Picture - Drama  
Chadwick Boseman ("Ma Rainey's Black Bottom")

- Best Television Limited Series or Motion Picture Made for Television  
"The Queen's Gambit" (Netflix)

- Best Performance by an Actress in a Limited Series or Motion Picture Made for Television  
Anya Taylor-Joy ("The Queen's Gambit")

- Best Performance by an Actress in a Supporting Role in a Series, Limited Series or Motion Picture Made for Television  
Gillian Anderson ("The Crown")

- Best Actress in a Supporting Role in Any Motion Picture  
Jodie Foster ("The Mauritanian")

- Best Television Series - Drama  
"The Crown" (Netflix)

- Best Motion Picture - Foreign Language  
"Minari" (A24)

- Best Performance by an

Actor in a Television Series - Drama  
Josh O'Connor ("The Crown")

- Best Actress in a Motion Picture - Musical or Comedy  
Rosamund Pike ("I Care a Lot")

- Best Television Series - Musical or Comedy  
"Schitt's Creek" (CBC)

- Best Performance by an Actor in a Television Series - Musical or Comedy  
Jason Sudeikis ("Ted Lasso")

- Best Original Score - Motion Picture  
"Soul" (Pixar) - Trent Reznor, Atticus Ross, Jon Batiste

- Best Original Song - Motion Picture  
"Io Si (Seen)" from "The Life Ahead" (Netflix) - Diane Warren, Laura Pausini, Niccolò Agliardi

- Best Performance by an Actress in a Television Series - Drama  
Emma Corrin ("The Crown")

- Best Screenplay - Motion Picture  
Aaron Sorkin - "The Trial of the Chicago 7" (Netflix)

- Best Performance by an Actor in a Limited Series or Motion Picture Made for Television  
Mark Ruffalo ("I Know This Much Is True")

- Best Motion Picture - Animated  
"Soul" (Walt Disney Pictures)

- Best Performance by an Actress in a Television Series - Musical or Comedy  
Catherine O'Hara ("Schitt's Creek")

- Best Performance by an Actor in a Supporting Role in a Series, Limited Series or Motion Picture Made for Television  
John Boyega ("Small Axe")

- Best Actor in a Supporting Role in Any Motion Picture  
Daniel Kaluuya ("Judas and the Black Messiah")

## MULUNGNEO

Ozü-i teti meima aliba asür **Süsütiba** (Changtongya), pa shirang tenzükba mapang nungi tasüba anogo tashi kija aser kibong, lokti tentet balala shimokisa nübo, rongsen aser sarasadem agi yaritepogo nenok ajak dang kangasa pelaba lemsateper.

Tsüngremi nenok mapa tajung asoshi maneni moajang ta aji ozü sarasadem.

**Temeim chirnur, semchir, anükapang aser kinüngertem**



Asoba anogo: 11.01.1950  
Asüba anogo: 20.02.2021



Office of the

## Yisemyong Students' Union

B.P.O. YISEMYONG

Theme: "Telongjem aser Tejakleni"

Estd - 1994

## TENÜNGSANG AGÜTSÜR

Er. Tekayanger Walling, S/o Lt. Repatsüngba Walling, Sub-Divisional Officer nungi Executive Engineer Nagaland Public Work Department jenjang tashi promotion tua konang nüngsang tulu bener aruba atema Yisemyong Students' Union-i pa nem tenüngsang aser tetushi tulu agütsür.

Tsüngremi asen lenir taküm aser wadang tarutsü mapang nunga ano maneni nüburtem asoshi moajang ta sarasademtsür.

Sd/-  
Kireluin  
Tir, YSU

Sd/-  
Moanaro  
Repsem Zülur, YSU

## TATOK MESHIR

2017 küm Lakhuni Village Council bangzüng nung Lakhuni yim senso shingai media nung yimtenren dak sendakba onük nung yim tenüng metetshitsü atema renema lir, ajsüaka Tir Yimyim osangkaket adok 25/02/2021 anogo nung onoki sangdong ka ajanga iba bangzüng anema inyakba atema tatok meshir.

1. Watitoshi *Caati*
2. Lanuakum *M. Danu*
3. Lolenmongba *Amang*
4. Suchakumba *Redu*
5. Moalong *Bo*
6. Watitemejan *Wah*

## ALI AYOKTSÜ LIR

Naga United Village, Daily Bazaar nungi minute 2 shi pilar.

Rs 220 per sq.ft (8000-9000)

Mobile no. 9362577022

## EGBERT ANDREWS AUCTION MART

Announces E-Auctions on 9.3.2021 & 12.3.2021 at 11 AM. A/C CE, HQ (P) Sewak. Stores: Tata Truck/Tipplers/LC, Gypsy, Dozers D50, D80, JCB, Stone Crushers, Construction Machinery/Items, Barrels Tyres, Misc. Salvage etc. Inspection at locations of 512 & 520 SSTC (GREF), Imphal & Dimapur. Visit Web: www.eaamindia.com.

## AR-i prangpong-injang sayu



**Kohima, Metsüremi/March 01, 2021 (TYO):** HQ IGAR (North) tawabangba kübok 1 Assam Rifles Lushai Battalion-i Hokolbarnü (26.02.2021) Kohima nung NCC Cadets dang prangpong-injang sayu.

Prangpong-injang sayuba sentong nung 1 Naga Girls indang Commanding Officer Col AH Khan den NCC Officer aser Senior Division - 24 Nagaland (I) Coy aser senior wings - 1 Naga Girls Bn of Kohima NCC Group nungi NCC cadets 200 agi tejangrar tulu nung shilem agiogo.

1 Assam Rifles Lushai Battalion indang instructor temi Cadets dang Indian Army-i

prangpong-injang balala amshiba indang rasa ashi. Prangpong-injang sayuba sentong ajanga cadets aikati Armed Forces nung adentsü asoshi tejangraba sayuogo.

Prangpong-injang sayuba sentong nung NCC Cadets tem senzüsembongtsü aser parnok nem süngo jemtsü anepalutsüba atema Brig K Venugopal, SM, Group Commander Kohima NCC Group tenüng nung Col Daniel Lotzem Commander Officer, 24 Nagaland (I) Coy NCC Kohima-i Col UC Sati, Commanding Officer aser 1 Assam Rifles Lushai Battalion nung rank ajak dang pelaba metetdaksüogo.

Assam Rifles High School, Mokokchung  
23 Assam Rifles  
PIN-932023, C/o 99 APO



Tel : 03692225222  
Fax : 03692225222

## ADVERTISEMENT OF APPOINTMENT

**ASSAM RIFLES HIGH SCHOOL, MOKOKCHUNG, 23 ASSAM RIFLES, C/O 99 APO (AFFILIATED TO CBSE, NEW DELHI)**

The following post are vacant in Assam Rifles High School, Mokokchung.

S/No	Name of Post	Minimum Qualification required	No of Post
1.	Principal	Masters Degree, B.Ed. and experiences of 5 years of teaching	01
2.	Science Teacher	MSc / BSc , B.Ed.(Experienced Teacher Preferable)	01
3.	Maths Teacher	MSc/ BSc , B.Ed Experienced Teacher Preferable)	02
4.	English Teacher	MA / B.A , B.Ed (Experienced Teacher Preferable)	01
5.	Social Science Teacher	MA / B.A , B.Ed (Experienced Teacher Preferable)	01
6.	Art Teacher	BFA in Art Education (Experienced Teacher Preferable)	01
7.	Primary Teacher	MA/B.A / BSc B.Ed /JBT/ ,D.El.Ed (Experienced Teacher Preferable)	02
8.	Aya		01

## NOTE:

- Preference will be given to the eligible candidate with working experience.
- Salaries and other facilities are negotiable.
- Interested candidates may send application with complete bio-data, contact number, photocopy of all documents and passport size photographs to above mentioned address latest by **10 Mar 2021**. The dates for written exam and interview shall be intimated separately to the candidates (Contact No. 03692225162, 03692225222 & 9612648647).

# Vijay Hazare Trophy: Nagaland-i Arunachal kokogo



**Dimapur, Metsüremi/March 1 (TYO):** Tang asayaa aliba Vijay Hazare Trophy nung tanü Nagaland aser Arunachal na asayaa liasü. Iba asaya Nagaland-i wicket 7 agi kokogo.

Asaya nung toss akokba sülen Arunachal team-i mezüng bat asütsü shim aser parnoki over 50 nung asayar 7 out ser run 285 yanglu.

Arunachal team atema Rahul Dalal-i 138, Vipin-i run 56 aser Akhilesh Sahani-i run 26 yanglu.

Nagaland team bowler tem rongnungi SS Mundhe-i wicket 4 agi aser Hopongkyu Sangtam o Khrievitso Kense nati wicket kaka agia liasü.

Asaya tanabuba shilem nung Nagaland team-i over 42.1 nung

asayar 3 out ser run 287 yanglu Arunachal team-i yanglur aliba run menepa asaya akok.

Nagaland team asoshi Jonathan Rongsen-i run 113, SS Mundhe-i run 102 aser Stuart Binny-i run 55\* yanglu.

Arunachal team bowler tem rongnungi Nazeeb Saiyed, Kumar Nyompu aser Obi nungeri wicket kaka agi.

# DR. Savizo N Yhome Memorial Tennis Cup tembangogo

**Dimapur, Metsüremi/March 1 (TYO):** Ibuba Dr. Savizo N Yhome Memorial Tennis Cup shibangba sentong February 27 nü Chavino Peseyie Tennis Complex, Kuda Village, Dimapur nung agiogo.

Sentong nung ojembiba mapang NLTA tir C Apok Jamir-i, tennis ya alima ajunga

nung kanga nungtugu asaya ka lir aser Ibuba Dr. Savizo N Yhome memorial tennis cup ayongzüka asayaba sülen Nagaland nunga iba asaya tejakleni renloka aotsü imlaba lemsatop. Paisa asayamung nung takok angurtem ajak nem tenüngsang agüja liasü.

Tebur kija aser tarep asaya

nung takoker nem senpet sen 50,000 den takok marok aser runners up nem senpet sen 30,000 den takok marok agütsüogo. Tebur kija asaya final nung Vilasier Khate-i Icheraibe Salie akok aser tebur tarep asaya nung Vilasier aser Theja Khate nati Vitsi aser Zaputso na koka liasü.

# NCA-i tetsür team sangdongogo



**Dimapur, Metsüremi/March 1 (TYO):** The Nagaland Cricket Association-i, Women's Senior One Day Trophy 2020-21 atema Senior Women's Cricket Team list sangdongogo.

**Team nung asayartem yamai alitsü:**  
Sentimenla Imsong (C), Elina Mura, Sariba Khan, Kekhrienuo Rupreo, Rwisumwi Basumatari, Lovikali V, Talirenla Pongen,

Merensola, Soyimkumla, Alemienla, Sara Jamir aser Ritu Karmakar.

Professional guest player: Vaincy Chaudhary, Nazam aser Tulika.

**Support staff:**  
Kechesin Keppen (team manager)  
Methasielie (team caoch)  
Sujit Rane (team S & C coach)  
Wangshinla Jamir (team physio)  
**Asaya mapanglem yamai**

**alitsü (Elite D Group):**  
13.03.2021: Nagaland Vs Punjab  
15.03.2021: Nagaland Vs Madhya Pradesh  
17.03.2021: Nagaland V Mumbai  
19.03.2021: Nagaland V Baroda  
21.03.2021: Nagaland V Kerala  
Asayatem ajak Indore nungdung asayatsü.

# Vijender taruba asaya Goa nung asayatsü

**New Delhi, Metsüremi/March 1 (Agencies):** India nunger professional boxer Vijender Singh taruba asaya Goa nung rong ka indang rooftop deck nung March 19 nü asayatsü. 2019 küm Nobember ita sülen pa tang mezüngbuba asayatsü aser pa den asayatsüpur tang tashi mesangdongi lir.

Arishi küm 35 tain reigning WBO Oriental aser WBO Asia Pacific Super Middleweight champion yagi tatensa Dubai nung Ghana nunger taoba mapang Commonwealth Champion Charles Adamu koka liasü. Iba asaya akokba ya pa asoshi asaya 12buba atonga akokba liasü aser iba sülen pa khen danga toktepa mali.

April-May ita taruba professional fight asayatsü imlaa ataba mapang Vijender

Singh Bhiwani boxer tem den spar süa arudar. "Majestic Pride Casino Ship, rooftop deck nung kodanga masayadanga asaya ka asayatsü, koba venue partner asütsü shimogo," ta pa indang promoters IOS Boxing Promotions-i ashi.

Majestic Pride rong ya Panaji, Goa nung Mandovi ayong nung anena lir.

"Iba asaya ya Vegas-style boxing event ka asütsü. Vijender den asayatsü asoshi asayar yakta sangdongtsü," ta asaya ayongertemi ashi.

"Iba amala asaya ya India nung khen danga masayadanga aser ni iba nung shilem agitsü maongka anguba atema pelar. Ni ring-i tanaben aitsü yongyar aser iba asaya atema ni training meranga agidar," ta Vijender-i ashi.

# England-i batting coach asütsü Trescothick shim



**Metsüremi/March 1, 2021 (Agencies):** Taoba mapang England opening batsman Marcus Trescothick, senior team batting coach asütsü atema shimogo, ta England and Wales Cricket Board (ECB)-i Hombarnü metetdaksü.

Trescothick, shibai England tenüng nungi Test 76 nung asayaogo aser 2005 küm Ashes akokba nung teyari agüja liasü, pai Somerset assistant coach mapa toktsür mapa tasenba belenzüksü.

Kasa mapang nung taoba

New Zealand off-spinner Jeetan Patel, England team spin bowling coach asütsü asoshi shimogo aser youth team head coach Jon Lewis, senior team pace bowling coach asütsü shimogo.

Maneni taoba Yorkshire off-spinner aser Gloucestershire head coach Richard Dawson-i Lewis melentsü.

"Marcus, Jon aser Jeetan nungeri temaba jenjang nung parnok sempet sayuogo aser tarutsü atema nukla aliba sayuogo," ta ECB Performance Director Mo Bobat-i ashi.

# Varun aser Malvika nati Gold angu

**Metsüremi/March 1, 2021 (Agencies):** India nunger badminton asayar Varun Kapur aser Malvika Bansod nati 2021 Kampala nung Uganda International asayamung nung takok tajung nguogo.

Final asaya nung Varun-i 21-18, 16-21, 21-17 agi seventh seeded asayar Sankar Muthusamy koka mezüngbuba senior international tebur kija asaya ka koktetogo.

Kasa mapang nung Malvika-ia tetsür kija asaya final nung India tsürsa Anupama Upadhyaya 17-21, 25-23, 21-10 agi kokogo.

Junior World No. 2 asayar Varun shibai Junior asaya nung kanga junga asayaa arudar pai taküm küm tetenzüklen title trokbuba kokogo. Final asaya

nung pai mezüngbuba asaya ayong ayonga akok aser tanabuba asaya makok. Ajisüaka tasembuba asaya nung arishi küm 17 tain asayar yagi asaya kanga junga azüoka asaya aser asaya ayong ayonga akok.

Tetsür kija asaya final nung Haryana tsür Anupama-i kanga junga asayaa tenzük aser mezüngbuba game akok. Ajisüaka arishi küm 19 tain Malvika-i asendenshir asayaa tanungba game ana koka gold medal angu. Sankar aser Anupama natia iba asayamung nung silver medal angu. Iba asayamung nung India, Germany aser Africa linüktem nungi asayartemi shilem agia liasü.

**BILEMDANGANG**  
"Taküm asadanga melira tejakleni renloka maotsü."